

Mas evento den lunanan cu ta sigui

Fundacion Bernadina cu di 7 festival di canto awe

ORANJESTAD - Den conferencia di prensa, miembronan di fundacion Bernadina Growell-Kock a invita un y tur pa e di 7 Festival di canto dedica na mama di Cultura Bernadina Growell-Kock. Mervin Ras ta trece padilanti cu e festival lo tuma luga awe anochi di 8or pa 1or di madrugada den Centro di Bario Brazil.

Meta di e festival ta pa duna sosten na desaroyo di nos folklore y cultura. Tambe pa contribui na conscientisacion di nos comunidad pa loke ta trata Mama di Cultura y su gran contribucion na nos folklore, cultura y arte. Na varios ocasion ta expone e cas pa tur hende por bishit'e. Mervin ta invita un y tur pa bin presencia e grandioso festival aki y ta gradici pa e



aporte cu ta ricibi di publico y sosten y presencia di prensa.

28 cantante

Lena Yarzagaray Orman ta trece padilanti cu tin 28 cantante cu lo participa di cual 4 ta hoben. Lo tin 8 grupo tipico cu lo acompaña e cantantenan. Carchinan ta obtenibel pa 10 florin cerca

miembronan di fundacion of cerca cantantenan of por yama Lena na cel. 5651145 of Persey cel. 7336007. Ruby Maduro kende ta participante na e festival a invita un y tur pa bin apoy'e y engrandece e festival mas ainda.

Chico Harms a anuncia diferente actividadnan pa cel-

ebracion di dia di brazil. E aña aki lo tin 8 actividad. Dia 30 di juni tin bendemento di bolo, 28 di juli festival di cantica di caya, 11 augustus tin parada acustico den cual gruponan tipico lo toca, dia 17 di augustus lo scoge reina di chikitin den tres categoria.

Dia 24 di augustus tin eleccion di reina grandinan den tres categoria y lo corona nos pilar cultural. Dia 30 di augustus tin e parada cultural di lanterna. Dia 1 di september tin e grandioso parada folklorico cultural den cual e aña aki lo participa 13 grupo, 5 banda y 5 disco y ta birando mas grandi dia pa dia. Pa clausura celebracion di dis di brazil lo tin un show multicultural pa prome biaha dia 7 di september.

Ta haci apelacion na esnan cu

kier participa, cu nan ta bonbini. Sebastian Ras a anuncia diferente actividad e.o. dia di tata un fiesta tipico den centro di bario Savaneta, dia 24 di juni celebracion di dia di San Juan lo tin presentacion di gruponan, dia 30 di juni den Sportboys tambe lo tin in fiesta tipico.

Roland Jansen tambe a hiba palabra. El a trece padilanti informacion encunto e festival di cantica di caya dia 28 di juli. Meta pa duna atencion na actividadnan di dia di brazil. Ta un festival di dos categoria, esta di cancionnan existente y cancionnan nobo. Edad ta 18 aña pariba. Tema di e cancionnan mester refleha nos cultura, custumbernan y ta pa prepara pa celebracion di dia di brazil. Ta invita tur bandanan pa inscribi te cu dia 21 di juli venidero.